

OS NPAS DIAS

Os Npas Dias, Zaj 1

Tswv Ntuj yuav muab txim rau Es Dos teb. 1 : 1 - 4.

1 1 Os Npas Dias yees pom tej yam nram no. HUAB TAIS Tswv Ntuj hais tej cov lus no txog Es Dos : "Peb tau hnov ib lub moo uas HUAB TAIS xa tuaj. Ib tug tiام lis tuaj hais rau cov kuj cuab tias : Nej sawv tsees ! Peb yuav mus ua rog ntaus lawv !" 2 "Es Dos, koj saib, kuv ua kom koj me me nyob hauv cov haiv neeg. Luag

thuam koj, thuam tshaj saud tsis muaj lawm ! 3 Koj lub siab muab hlob coj koj mus yuam kev lawm. Koj niaj hnub nyob txawm hauv qhov tsua, koj muab tej toj roob ua koj chaw nyob, koj hais nyob hauv koj siab tias : Leej twg thiaj yuav ua tau kom kuv poob hauv pem teb ? 4 Tab yog koj txawj ya taus siab cuag liaj dav, tab yog koj ua tau koj lub zes nyob saum cov hnub qub, mas kuv tseem yuav ua tau kom koj poob los !" HUAB TAIS ceeb toom lo lus ntawd.

YOS NAS

Yos Nas, Zaj 1 thiab 2

Yos Nas tsis mloog Tswv Ntuj Ius. 1 : 1 - 16 + 21.

1 1 HUAB TAIS hais rau Yos Nas uas yog As Mis Tais tus tub tias :
2 "Koj sawv tsees mas ! Koj mus tom lub tuam tsheej Nis Nis Vas. Koj mus hais rau lawv tias lawv qhov phem nce tuaj txog kuv lawm."
3 Yos Nas sawv mus kev, khiav mus rau Tas Xis kom nws tau nyob deb ntawm HUAB TAIS. Nws mus nram Yos Pes, nws nrhiav tau ib lub nkoy yuav mus Tas Xis. Nws them nqe kev tib si ces nws nce hauv lub nkoy nrog lawv mus Tas Xis, nyob deb ntawm HUAB TAIS.
4 Tab sis HUAB TAIS tso cua hlob tuaj ntsawj lub hiav txwv ua lub nkoy yuav luag tawg tas. 5 Cov tub nquam nkoy ntshai. Lawv nyias thov nyias tus dab tuaj pab. Lawv muab cov toob xib pov tseg rau hauv dej kom lub nkoy sib tuaj. Ntawm Yos Nas mas nws nqes mus hauv lub qab nkoy nws mus pw tsaug zog hauv lawm.
6 Lawv tus ntswj nkoy los hais rau Yos Nas tias :
"Koj tseem tau zoo tsaug zog thiab lod ? Koj sawv los thov koj tus Tswv Ntuj mas ! Tej zaum Tswv Ntuj yuav nco txog peb, ces peb yuav tsis tuag."
7 Ces lawv sib tham tias :
"Peb ntaus kuam saib yog leej twg coj xwv txheej tuaj rau peb."
Lawv txawm ntaus kuam, ces raug Yos Nas. 8 Lawv hais rau Yos Nas tias: "Koj sim qhia peb saib koj ua txoj hauj lwm dab tsi ? Koj nyob lub teb chaws twg tuaj ? Koj yog haiv neeg twg ?"

9 Yos Nas teb lawv tias :
"Kuv yog ib tug Hes Nplaws, kuv teev HUAB TAIS, tus Tswv Ntuj uas tsim lub hiav txwv thiab tsim lub ntiaj teb."
10 Cov nquam nkoy txawm ntshai, lawv hais rau Yos Nas tias :
"Ua cas koj ua li ntawd ? Vim lawv twb paub tias yog nws khiav mus deb ntawm HUAB TAIS. Nws xub hais qhia lawv lawm."
11 Lawv nug Yos Nas tias :
"Peb yuav ua li cas rau koj kom lub hiav txwv rov tus yees ? Vim lub hiav txwv nphau heev zuj zus tuaj."
12 Nws teb rau lawv tias :
"Nej muab kuv pov rau hauv lub hiav txwv, ces dej yuav tus rau nej. Yog tim kuv mas cua thiaj hlob li no."
13 Lawv nquam lub nkoy rov los rau tim ntug nqhuab, tab sis tsis tau vim dej nphau heev zuj zus.
14 Ces lawv thov HUAB TAIS tias :
"HUAB TAIS, thov koj tsis txhob cia peb tuag vim tus neeg ntawd. Koj tsis txhob cia peb ris tus neeg ntawd txoj sia, peb tsis tau ua txhaum. Koj ua rau nws raws li koj nyiam xwb."
15 Ces lawv nthos nkaus Yos Nas thiab muab nws pov rau hauv lub hiav txwv. Tam sim ntawd lub hiav txwv tus yees tuaj. 16 Lawv ntshai HUAB TAIS, ces lawv cev ib co txim rau HUAB TAIS, lawv fiv yeem.
21 HUAB TAIS ua kom ib tug ntses loj loj tawm tuaj nqos Yos Nas. Yos Nas nyob hauv tus ntses plab peb hnub peb hmos.

Yos Nas dim ntawm kev tuag. 2 : 2 - 10.

- 2** 2 Yos Nas nyob hauv tus ntses lub plab, nws teev nws tus HUAB TAIS Tswv Ntuj. Nws hais tias :
 3 "Nyob hauv kuv txoj kev txom nyem, kuv qw suab mus txog HUAB TAIS. Nws teb kuv. Nyob hauv ntuj txias teb tsaus, kuv qw. Koj hnov kuv lub suab. 4 Koj muab kuv pov tseg rau puag hauv qab tiv txwv. Dej nphau nphwv los vov kuv tas.
 5 Kuv xav hais tias kuv nyob deb ntawm koj lub ntsej muag lawm ! Kuv yuav ua li cas rov mus pom tau koj lub Tuam Tsev Ntshiab ?
 6 Dej nce txij kuv caj dab, txoj kev tuag nyob ncig kuv tas.
 Tej ntxhuab hauv hiav txwv khaub zig kuv taub hau tas.
 7 Kuv tau nqes mus txog puag nruab yeeb, mus txog tej hauv paus roob, mus txog ib lub teb chaws uas lawv liaj qhov rooj kaw kuv. Tab sis, kuv tus HUAB TAIS , koj cawm kuv txoj sia puag hauv qhov tuag los.
 8 Kuv tus plig yuav luag tso kuv tseg, kuv nco txog kuv tus HUAB TAIS Tswv Ntuj, ces kuv zaj thov Ntuj nce tuaj txog koj, mus txog koj lub Tuam Tsev Ntshiab.
 9 Cov neeg uas lawv tsob hwb tej tus dab tsis tseem ceeb, yog lawv tso lawv lub txiaj ntsim pov tseg.
 10 Kuv yuav cav txog koj lub npe, yuav mus hlawv tsiaj txi rau koj.
 Lub yeem uas kuv tau fiv, kuv yuav mus pauj. Kev cawm tuaj ntawm HUAB TAIS tuaj."
 11 Ces HUAB TAIS hais rau tus ntses kom nws mus ntuav Yos Nas rau tim ntug dej.

Lub tsheej Nis Nis Vas thov txim, Tswv Ntuj zam rau lawv. 3 : 1 - 10.

- 3** 1 HUAB TAIS lub suab nrov tuaj

- rau Yos Nas yog zaum ob tias :
 2 "Yos Nas, koj yuav mus kom txog lub tuam tsheej Nis Nis Vas. Tej lus uas koj yuav hais rau lawv mas kuv mam qhia rau koj hais."
 3 Yos Nas mloog HUAB TAIS lus. Yos Nas sawv kev tsees mus lawm Nis Nis Vas. Lub tsheej Nis Nis Vas yog ib lub tsheej loj thiab zoo saib. Yuav mus peb hnub thiaj hla dhau lub tsheej. 4 Yos Nas mus txog, nws mus ib hnub kev nws thiaj tuaj txog hauv plawv tsheej. Nws hais rau sawv daws tias :
 "Tshuav plaub caug hnub, mas lub tsheej Nis Nis Vas yuav raug rhuav tas."
 5 Tam sim ntawd, cov neeg nyob Nis Nis Vas ntseeg Tswv Ntuj. Ces lawv ceeb toom rau tsoom sid tias :
 "Tsis hais tus laus los tus hluas, tus hlob los tus yau, sawv daws yuav yoo mov thiab hnav ntaub tsaj them txim."
 6 Thaum tus vaj kav lub tsheej Nis Nis Vas tau hnov cov lus ntawd, nws sawv ntawm nws lub theej kiab mus hle nws tej ris tsho muaj hwj chim ua vaj tseg. Nws muab ntaub tsaj los hnav, nws mus zaum hauv qhov tshawv.
 7 Tus vaj hais ib lo lus ceeb toom rau cov neeg nyob hauv lub tsheej Nis Nis Vas tias :
 "Tej neeg, tej tsiaj txhu, cov hlob, cov yau sawv daws yuav tsis txhab noj tsis txhab haus li. 8 Tus twg kuj yuav hnav ntaub tsaj ntaub ntxhib thiab yuav hu txog Tswv Ntuj tas zog. Tsis hais leej twg, nyias yuav tso nyias txoj kev txhaum pov tseg tas huv si.
 9 Tus twg los yuav tsis txhab ua ib qhov txhaum ntxiv, nyaj tej zaus Tswv Ntuj siab yuav nqig, ces peb sawv daws yuav tsis tuag."
 10 Tswv Ntuj pom cov neeg nyob Nis Nis Vas muab siab rau tso txoj kev

txhaum tseg tig los yuav lub siab tshiab, ces Tswv Ntuj hloov siab, nws tsis nplua lub tsheej Nis Nis Vas.

Yos Nas npau taws, Tswv Ntuj ntuaas nws. 4 : 1 - 11.

4 1 Yos Nas chim kawg thiab nws npau taws. 2 Nws thov HUAB TAIS zoo li no :

"HUAB TAIS, yog zoo li kuv lus tiag ! Thaum kuv tseem nyob hauv kuv lub teb chaws kuv twb xub tau hais li ntawd lawm. Tos kuv tau khiav mus rau Tas Xis los yog vim kuv yeej paub tias koj yog ib tug HUAB TAIS khuv leej neeg, koj hlub neeg mos nyoos, koj npau taws qeeb, koj pub txiaj ntsim ntau, koj rov than koj lo lus phem. 3 HUAB TAIS, nyem no koj than kuv txoj sia mus mas ! Yog kuv tuag mas zoo dua kuv muaj txoj sia nyob."

4 HUAB TAIS teb tias :

"Koj puas muaj cai yuav npau taws ?"

5 Yos Nas tawm hauv lub tsheej mus, nws mus zaum nyob ntawm lub tsheej sab toob fab. Nws ua ib lub tsev pheeb suab rau nws nkaum ntxoov ntxoo, nws ntsia saib yuav muaj dab tsi tshwm sim tuaj hauv lub tsheej.

6 Ces HUAB TAIS Tswv Ntuj ua kom muaj ib tug txiv ntoo roj hlob tuaj ntxoov Yos Nas, kom tshav txhob kub nws taub

hau thiab kom nws tsis txhob mob taub hau. Yos Nas pom tus txiv ntoo roj, nws zoo siab kawg.

7 Tab sis tag kis sawv ntxov, Tswv Ntuj ua kom muaj kab tuaj t xo tus ntoo, ces tus ntoo qhuav tas. 8 Thaum lub hnub tuaj siab lawm, Tswv Ntuj ua kom muaj ib nthwv cua kub lug tuaj, lub hnub ziab rau Yos Nas taub hau ua kom nws tsis zoo nyob. Ces Yos Nas thov tuag xwb. Nws hais tias :

"Kuv tuag zoo dua kuv muaj txoj sia nyob."

9 HUAB TAIS hais rau Yos Nas tias : "Koj puas muaj cai npau taws rau tsob ntoo ntawd ?"

Yos Nas teb tias :

"Kuv yeej muaj cai, kuv npau taws tshuav tuag xwb."

10 HUAB TAIS rov hais tias :

"Koj mob siab rau tus ntoo ntawd, koj twb tsis tau siv zog cog, koj tsis tau ua kom hlob, nws tuaj nws hmo ntawd, ces nws rov tuag nws hmo ntawd xwb.

11 Kuv ne, vim li cas kuv thiaj yuav tsis mob siab rau lub tsheej loj Nis Nis Vas thiab lod ? Nyob hauv lub tsheej kam muaj tshaj ib puas nees nkaum txhiab leej neeg uas tsis tau paub tab dab tsi, uas tseem tsis tau paub lawy sab laug thiab sab xis yog sab twg, thiab muaj tsiaj txhu ntau ntau, kuv puas yuav luaj xov muab txim rau sawv daws huv tib si ?"

MIS KES

Mis Kes, Zaj 1, 2 thiab 3

Tswv Ntuj muab txim rau cov His Xas Lais, vim lawv tsis txawj hlub cov neeg pluag. 1 : 1 - 3 + 2 : 1 - 5.

- 1** 1 Lub caij Yos Tas, As Kas thiab Es Xes Kias lawv ua vaj nyob Yus Das teb mas Tswv Ntuj hais cov lus nram no rau Mis Kes nyob Mos Les Ses. Nws yees pom tej yam hais txog Xas Mas Lias thiab Yes Lus Xas Les.
2 Tas txhia haiv neeg, nej mloog mas ! Ntiaj teb thiab tas txhua yam uas nyob hauv koj, nej tswm seeb mas ! HUAB TAIS yuav ua tim khawv txiav txim rau nej.
3 Nej saib, Huab Tais tawm hauv nws lub tuam tsev ntshiab los, nws nqes, nws tsuj ntiaj teb tej toj roob siab.

- 2** 1 Cov neeg nrhiav kev ua hauj lwm lim hiam thiab cov neeg uas thaum lawv tseem pw hauv txaj lawv twb npaj ua phem, mas lawv raug txoj hmoov tsis zoo.
Ntuj nyuam qhuav kaj lawv twb ua, vim lawv txhais tes ua tau.
2 Yog lawv ntshaw yuav luag tej liaj teb mas lawv cia li mus txeeb.
Lawv ntshaw yuav mas lawv nyiag luag tej vaj tse. Lawv ntes tus tswv tsev, nrog nws tej cuab yeej cuab tam.
3 Vim li ntawd HUAB TAIS thiaj hais zoo li no :
"Kuv txiav siab tias kuv yuav tso kev txom nyem los raug nej, yog ib txog kev txom nyem uas nej yuav tsis tau kev fee nej lub caj dab kom dim.
Nej yuav mus kev tsa taub hau siab tsis

tau, vim txog lub caij raug xwv txheej lawm. 4 Hnub ntawd, luag yuav sau tej zaj thuam nej. Luag yuav hu ib zag nkauj seev, luag yuav hais tias :

Peb tsis tshuav dab tsi noj thiab hnav lawm. Lawv ntsuas peb haiv neeg lub cuab tam tas. Peb cov teb, lawv muab rau cov neeg teev dab tas.

5 Yuav tsis muaj leej twg pov hlua mus ntsuas ib thaj av uas yuav pub rau cov nyob hauv HUAB TAIS tsoom neeg lawm."

Tswv Ntuj yuav muab txim rau cov nom tswv nyob Xis Yoos.

3 : 9 - 12.

3 9 Cov ntaus thawj kav Yas Kos tsev neeg, cov nom tswv saib His Xas Lais tsev neeg, nej mloog qhov no : Nej ntxub kev ncaj kev ncees, nej ua kom tej yam ncaj nkhaus tuaj.

10 Nej muab luag roj ntsha los txhim Xis Yoos, nej muab luag tua kom tau txhim Yes Lus Xas Les.

11 Cov ntaus thawj txiav txim lawv txais cov nyiaj xiab. Cov leej choj noj nyiaj los txi Ntuj. Cov yaj saub cuav ntaus txheeb kuj noj nyiaj. Lawv dag tias lawv ib rau HUAB TAIS.

Lawv hais tias :

"HUAB TAIS tsis nyob nruab nrab peb lod ? Xwv txheej yuav tsis nphav peb li !"

12 Yog vim nej ua txhaum li ntawd, mas Xis Yoos yuav hloov ua thaj liaj ua laij tag, Yes Lus Xas Les yuav hloov ua ib pawg pob zeb vau tas, lub roob uas muaj lub Tuam Tsev Teev Ntuj yuav hloov ua ib koog zoov.

**His Xas Lais yuav txom nyem mus
txog lub caij ib tug poj niam yuav
xeeb tub. 5 : 1 - 4.**

5 1 Npes Les Hes, Es Fas Tas, koj yog lub zos me nyob hauv Yus Das cov xeem. Tus yuav kav His Xas Lais yuav tawm ntawm koj los ua kuv li. Nws lub keeb tuaj ntawm puag txheej thaud tuaj.

2 Yog vim li ntawd mas HUAB TAIS yuav tso cov His Xas Lais pov tseg ib ntus, mus txog lub caij uas tus yuav yug me nyuam nws yug tau nws tus me nyuam lawm.

Txog lub caij ntawd, tus yug los cov kwv tij seem yuav rov los nrog His Xas Lais tsoom me nyuam.

3 Tus yug los yuav sawv, nws yuav zov nws pab yaj nog zaub. HUAB TAIS lub hwj huam nres nws. Tswv Ntuj lub npe muaj hwj chim nrog nws. Lawv yuav tsa vaj tsa tsev vim tus saib lawv yuav nto moo loj mus txog npoo ntiaj teb. 4 Lub teb chaws yuav tau nyob thaj yeeb.

Tswv Ntuj txiav txim rau nws haiv neeg. 6 : 1 - 4 + 6 - 8.

6 1 Nej mloog HUAB TAIS hais lus no :

"Nej sawv tsees mas ! Nej tuaj nrog kuv tu plaub tu ntug, kom toj roob hauv pes hnov nej lub suab.

2 Tej toj roob, nej mloog HUAB TAIS ua plaub rau nws haiv neeg. Ntiaj teb lub hauv paus, koj mloog ! HUAB TAIS nrog nws haiv neeg ua plaub, nws ua plaub tiv His Xas Lais.

3 Kuv haiv neeg, kuv tau ua dab tsi rau nej ? Kuv tau ua dab tsi kom sab nej ! Nej teb kuv mas !

4 Yog kuv tau ua kom nej tawm hauv

Hais Nkws Tos teb los. Kuv tau txhiv nej kom nej dim ntawm lub tsev nej ua qhev. Kuv tau xa Mais Xes, As Loos thiab Mis Lias tuaj tos nej."

6 His Xas Lais hais tias :
"Kuv yuav muab dab tsi mus cev rau HUAB TAIS ? Kuv puas yuav pe tus Tswv Ntuj nyob siab ? Kuv puas yuav muab cov xyuas nyuj muaj ib xyoos los hlawv ?

7 Tab yog kuv txi ntau txhiab tus laug tthis nws puas yuav nyiam ? Tab kuv hliv roj ntau cuag li dej ntws los nws puas yuav zoo siab ? Kuv puas yuav tsum muab kuv tus tub hlob los them nqe txhaum ? Kuv puas yuav tsum cev tus tawm ntawm kuv cev nqaij los them kuv qhov txim txhaum ?"

8 Tus Yaj Saub hais tias :
"Leej tib neeg, Ntuj twb qhia qhov zoo rau koj. Qhov uas HUAB TAIS xav kom koj ua mas tsuas yog ua raws txoj kev ncaj xwb, yog rau siab hlub luag mos nyos, thiab xyaum mus ua lub neej nrog koj tus Tswv Ntuj."

His Xas Lais cov yeeb ncuab yuav thuam tsis tau His Xas Lais.

7 : 7 - 9.

7 7 Ntawm kuv, mas kuv tsa muag ntsia HUAB TAIS, kuv tso siab rau tus Tswv Ntuj yuav cawm kuv, kuv tus Tswv Ntuj yuav mloog kuv.

8 Kuv tus yeeb ncuab Es Dos, koj tsis txhob zoo siab pom kuv raug txom nyem. Vim tias kuv ntog, tab sis kuv yuav rov sawv, kuv nyob hauv qhov tsaus ntuj, tab sis HUAB TAIS yog kuv qhov pom kev.

9 Kuv yuav tsum ua tiag nyiaj cia HUAB TAIS npau taws, vim kuv tau ua txhaum rau nws. Thaum nws txiat txim rau kuv tas lawm, mas nws mam tsa kuv

cai, nws mam tso kuv tawm los rau qhov
kaj, ces kuv zoo siab pom nws tej hauj
lwm ncaj.

**Tso siab tias Tswv Ntuj yuav hlub
His Xas Lais. 7 : 14 - 15 + 18 - 20.**

14 Koj cia koj pab yaj nog zaub, koj rab
pas zov lawv. Pab yaj uas koj qee los ua
koj cuab tam, lawv xawb zaub nog hauv
tej hav khaub hav tsuag, nyob hauv cov
vaj txiv ntoo xwb.

Kheev lam lawv tau kev rov los nog
zaub nyob Npas Sas thiab nyob Nkas Las,
xws li yav thaum ub !

15 Koj ua hauj lwm zoo nkauj rau lawv

pom li thaud lawv tawm hauv Hais Nkws
Tos teb los !

18 Tus Tswv Ntuj twg thiaj yuav ntxuav
txhaum thiab zam txhaum zoo li koj ? Tus
Tswv Ntuj twg thiaj yuav tsis npau taws
mus li thiab nyiam zam txim xws li koj ?
19 Thov koj hlub peb ib zaug ntxiv thiab
mas !

Koj muab peb tej txhaum pov tseg hauv
av, koj muab tsuj. Koj muab tej yam
phem peb ua pov rau hauv qab tiv txwv
mas !

20 Koj ua tus npuab Yas Kos. Koj pub
koj lub txiaj ntsim rau Has Nplas Has,
zoo li koj tau cog lus rau peb cov yawg
koob thaum ntxov ub.

NAS HWS

Nas Hws, Zaj 1 thiab 3

**Tswv Ntuj siab zoo, thiab nws muaj
hwj xyeej.** 1 : 1 + 3 + 6 - 8.

- 1** 1 Cov lus ceeb toom txog Nis Nis
Vas. Yog phau ntawv khaws tej yam
uas Nas Hws nyob Ees Kos nws yees
pom xyeem.
3 HUAB TAIS npau taws qeeb. Tab sis
nws lub hwj huam loj kawg. Tus neeg ua
txhaum mas HUAB TAIS tsis cia nws ua
neeg tsis raug txim.
6 Thaum HUAB TAIS npau taws, leej
twg yuav tiv taus nws ?
Leej twg yuav sawv taus nyob ntawm
nws xub ntiag ? Thaum nws npau taws
mas yog zoo li ib co hluav taws :
tej pob tsuas tawg tas nyob ntawm nws
xub ntiag.
7 HUAB TAIS siab zoo, nws yog zoo li
ib lub tsheej txuag cov neeg raug kev
txhawj. Thaum ib co neeg vam txog nws
mas nws zeem tau lawv zoo.
8 Tab sis nws yuav rhuav cov neeg sawv
tiv nws.
Nws yuav caum nws cov yeeb ncuab mus
txog tej qhov tsaus ntuj nti.

**Tswv Ntuj ceeb toom tias yuav
muab txim rau Nis Nis Vas.**
3 : 1 - 3 + 6 - 7.

- 3** 1 Kev txom nyem yuav tuaj raug
lub nroog uas nyiam pom ntshav
ntws, nyiam txoj kev dag, niaj hnub ua
tub sab, niaj hnub lwg luag tej !
2 Nej mloog saib ! Hnov hlua nrov
nplawm ntws, hnov log tsheb nrov zig
zawg, nees rag ntws tuaj, tsheb khiav yim
pliag.
3 Tus tsav tsheb, nws tsav khov kho,
hniav ntaj liab ploog cuag nplaim taws,
hmuv laim txias. Neeg ntog pawg lug,
neeg tuag sis laub sis lug, pw pawg lug
puv tej nras tiaj.
Tsuj qhov twg los dawm neeg tuag !
6 Nis Nis Vas, kuv yuav cuam tog khaub
tog tsuag rau koj, kom koj poob tsim, kuv
yuav coj koj mus rau ntawm tus ncej tua
neeg.
7 Leej twg pom koj, nws yuav fee plhu
hlo rau koj. Nws yuav hais tias :
"Nis Nis Vas ! Ua cas koj yuav ua lwj
liam tas ! Leej twg thiaj yuav hlub taus
koj ? Yuav mus nrhiav neeg qhov twg los
nplij koj ?"

HAS NPAS KWS

Has Npas Kws, Zaj 1 thiab 2

**Thov kom HUAB TAIS tuaj pab,
HUAB TAIS teb.**

1 : 2 - 3 + 12 - 17 + 2 : 1 - 4.

1 2 Tus Yaj Saub Has Npas Kws hais tias :

"HUAB TAIS, kuv yuav hu koj txog thaum twg, hos koj tsis mloog ? Kuv tseem yuav qw npaum li cas tias : 'Lawv muab kuv tua !' Ces koj mam tuaj npo kuv ? 3 Vim li cas koj cia kuv pom tej yam tsis ncaj ? Vim li cas koj nyob twj ywm ntsia lawv yuam tsoom sid ?

Kuv tsuas tau pom kev ua tub sab, kev sib ntaus sib ceg sib ncaim xwb !

12 HUAB TAIS, txij puag thaum ntxov ub los koj yog kuv tus Tswv Ntuj, kuv tus Ntshiab, tus tsis txawj tuag.

HUAB TAIS, koj yog tus ua raws txoj kev ncaj, koj yog tus nyob khov kho xws li tsua, koj yog tus muab txim.

13 Koj lub qhov muag ntshiab huv, koj tsis xav pom qhov phem. Koj ntsia tsis taus txoj kev yuam luag ?

Vim li cas koj ntsia cov neeg siab phem ? Thaum tus neeg phem ntaus tus siab ncaj dua nws, vim li cas koj ua twj ywm ?

14 Koj puas yuav saib neeg xws li lawv yog ntses nyob hauv hiav txwv, uas lawv dhia lawv tsis muaj tswv ?

15 Tus yeeb ncuab xuas pas los nuv, xuas tsig los puav thiab xuas vas los khwb ntses. Ces tus tau ntses nws dhia zoo siab !

16 Nws txi dab rau nws lub tsig, nws hlawv xyab hlawv ntawv rau lub vas. Vim lub tsig thiab lub vas pub nqaij ntses ntau rau nws, nws tau coj mus ua tej pluag qab noj.

17 Nws puas yuav tau kev pov nws lub vas mus li mus tua cov haiv neeg uas tsis paub kev hlub neeg ?

2 1 Kuv yuav mus nyob ntawm kuv qhov chaw zov rooj loog, kuv yuav mus sawv saum kuv lub ntsa zeb, kuv yuav tos saib nws yuav hais dab tsi rau kuv, nws yuav teb dab tsi rau kuv.

2 Thaum ntawd HUAB TAIS teb kuv tias :

"Koj sau zaj koj pom cia, koj muab txaug saum daim txiag kom luag tau kev nyeem yooj yim. 3 Vim tias qhov koj yees pom ntawd nws muaj nws lub caij yuav tshwm sim tuaj. Qhov ntawd yuav tshwm sim tuaj tiag, tsis yog dag, yog tsis tau txog lub caij mas koj yuav tos. Yeej yuav muaj tuaj xwb !

4 Tus neeg siab nkhaus, nws yuav qaug. Tus siab ncaj nws yuav muaj txoj sia vim nws lub siab pheej xeeb."

XOS FOS NIAS

Xos Fos Nias, Zaj 1, 2 thiab 3

HUAB TAIS lub hnub nyooog.

1 : 14 - 18 + 2 : 3.

1 14 HUAB TAIS lub hnub nyooog tuaj txog ze lawm.

Yog ib lub hnub nyooog muaj hwj xyeej loj tas nrho. Nws tuaj txog ze, nws tuaj sai ! Thaum txog HUAB TAIS lub hnub nyooog, yuav hnov suab quaj ntsuag qees tsiv mloog kawg ! Zoo li ib tug tub rog qw ib lub suab nias tsam.

15 Lub hnub nyooog ntawd yog ib lub hnub nyooog npau taws !

Yog lub hnub nyooog raug kev txhawj xeeb kev hiam, raug kev tu siab, raug kev ntxeev ua lwj liam. Yog lub hnub nyooog tsaus ntuj nti, huab dub nciab.

16 Yog lub hnub nyooog tshuab puab, qw cov suab ntaus rog, mus txeeb cov tsheej xov ntsa zeb, txeeb cov tsev sam thiaj.

17 Kuv yuav tso tas zeej tsoom poob hauv kev ploj kev tuag, lawv yuav maub mus kev xws li ib co neeg dig muag. Lawv tej roj ntsha yuav paim xws li ib co plua av. Lawv tej qauv tuag yuav raug muab pov tseg xws li ib co quav chiv.

18 Lawv tej nyiaj tej kub yuav cawm tsis tau lawv.

Lub hnub nyooog uas HUAB TAIS yuav npau taws, mas nws lub siab kub yuav hlawv tas lub ntiaj teb.

Vim nws yuav rhuav lub ntiaj teb neeg kom tu noob.

2 3 Nej sawv daws uas nej yog tsoom me neeg txheej qis nyob tas ntiaj teb, yog cov neeg mloog cov lus qhia, nej nrhiav HUAB TAIS mas !

Nej nrhiav txoj kev ncaj, nej nrhiav txoj kev ua tus me.

Ces thaum txog hnub HUAB TAIS npau taws nyaj nej yuav tau chaw nkaum.

Lus ceeb toom txog cov hlob nyob

Yes Lus Xas Les. 3 : 1 - 5.

3 1 Yes Lus Xas Les, lub nroog ntxeev siab, lub nroog vuab tsuab, nroog quab yuam tib neeg, nws yuav raug txoj hmoov phem !

2 Nws tsis tau mloog Tswv Ntuj lub suab hu nws. Nws tsis txais lo lus qhuab qhia nws. Nws tsis tau tso siab rau HUAB TAIS. Nws tsis tau txav los ze nws tus Tswv Ntuj.

3 Yes Lus Xas Les cov vaj txheeb zoo li ib co tsov ntxhuav nyooj laws. Nws cov nom txiav txim zoo li ib co hma nrhiav ncauj hmo ntuj, thaum kaj ntug tsis tshuav dab tsi li.

4 Nws cov yaj saub yog ib co neeg khav theeb hais lus dag lus cuav. Nws cov leej choj ua kom yam ntshiab puas tas, lawv hla Txoj Cai.

5 HUAB TAIS nyob nruab nrab hauv Yes Lus Xas Les, nws siab ncaj, nws tsis ua ib yam thuam Txoj Cai. Niaj hnub kaj ntug nws tshaj nws Txoj Cai, nws tsis so ib tag kis li.

Cov pej kum haiv neeg yuav tig los hu txog HUAB TAIS lub npe.

3 : 9 - 10.

9 Muaj tiag ! Kuv yuav ntxuav cov haiv neeg di ncauj kom huv, kom lawv tau

Xos Fos Nias, Zaj 3

tuav txog HUAB TAIS lub npe, kom lawv tau tsob hwb nws thiab txais nws tus quab.

10 Cov teev kuv yuav hla cov dej nyob
Nus Npias teb sab tid tuaj, lawv yuav nqa
lawv cov txim tuaj txi rau kuv.

Cov nrhiav Tswv Ntuj yog Pab Seem His Xas Lais, lawv tsis muab hlob. 3 : 11 - 13.

11 Yes Lus Xas Les, hnub ntawd koj
yuav tsis txaj muag ntxiv, txawm tias koj
tau ua qhov phem rau kuv.

Vim kuv yuav ntiab cov neeg muab hlob
kom tawm hauv koj mus. Koj yuav tsis
tau nyob piav yeev saum kuv lub roob
ntshiab ntxiv.

12 Cov neeg kuv yuav cia nyob hauv koj
lub loog ntxiv yog ib haiv neeg tsis muab
hlob, tsis khav theeb. Pab Seem His Xas
Lais yuav nrhiav chaw vam khom nyob
hauv HUAB TAIS lub npe.

13 Pab Seem His Xas Lais yuav tsis coj
kev nkhaus ntxiv. Lawv yuav tsis hais lus
dag lawm. Yuav tsis pom ib tug nplaig
nkhaus nyob hauv lawv ntxiv.

Lawv yuav tau kev nog zaub, tau kev so.
Tsis muaj leej twg yuav ua ntxhov lawv
siab.

Nkauj lom zem cav txog Xis Yoos.

3 : 14 - 17

14 Leej me ntxhais Xis Yoos,
koj seev suab luag lom zem mas !
Tsoom His Xas Lais, nej cav lus zoo
mog ! Me ntxhais Yes Lus Xas Les, koj
dhia hom khaj mas ! 15 HUAB TAIS
yuav thim nws cov lus txiav txim rov qab.
Koj yuav tsis pom koj cov yeeb ncuab
ntxiv. Huab Tais ua vaj nyob nruab nrab
hauv koj, His Xas Lais. Koj yuav tsis
ntsib kev raug xwv txheej ntxiv. 16 Hnub
ntawd, cov neeg nyob Yes Lus Xas Les
hais tias :

“Xis Yoos, koj txhob ntaus siab me !
Koj ob txhais tes tsis txhob tshee !

17 Koj tus HUAB TAIS Tswv Ntuj
nyob nruab nrab hauv koj ! Nws yog tus
cawm koj.

Nws zoo siab tas nrho vim koj. Nws hlub
koj, nws ua kom koj rov tshiab tuaj. Nws
dhia hom khaj, kuj yog vim koj.”

AS NKAIS

As Nkais, Zaj 1 thiab 2

**Ntuas cov His Xas Lais kom rov
txhim lub Tuam Tsev Teev Ntuj.**
1 : 1 - 8.

1 1 Xyoo ob uas Das Lis Yus ua vaj,
lub rau hli xiab ib, tus Yaj Saub As
Nkais hais HUAB TAIS cov lus rau
Ntxos Los Npas Npes uas yog ib tug nom
Yus Das thiab rau tus thawj Leej Choj
Yos Xuas.

2 Tsoom tub rog tus HUAB TAIS hais
lo lus no :
"Haiv neeg no hais tias tsis tau txog caij
rov tsa lub Tuam Tsev Teev HUAB
TAIS.

4 Cov His Xas Lais, thaum lub Tuam
Tsev ntawd piam tseem tas, mas puas yog
lub caij nej yuav nkaum zoo zoo hauv nej
tej tsev pua txiag zoo nkauj ?"

5 Tsoom tub rog tus HUAB TAIS hais li
no :

"Nyem no nej xav tswv yim saib nej tau
taug txoj kev twg ? 6 Nej tau tseb noob
ntau, tab sis nej sau tau tsawg rau hauv
txhab. Nej noj mov lawm, tab sis nej noj
tsis tsau. Nej haus dej, tab sis tsis tau
daws nej qhov nqhis. Nej tau hnav, tab
sis tsis sov nej. Tus txais nyiaj hli, nws
muab nws cov nyiaj hli ntim rau hauv ib
lub hnab to qab xwb !

8 Tsoom tub rog tus HUAB TAIS hais li
no :

"Nej xav tswv yim saib nej tau taug txoj
kev twg ! Nej yuav nce mus saum roob
mas ! Nej mus kwv ntoo rov los tsa lub
Tuam Tsev.
Kuv yuav nyiam lub tsev ntawd. Kuv
yuav muab kuv lub hwj chim rau nej pom
nyob hauv lub tsev ntawd."

**Lub Tuam Tsev Teev Ntuj yuav
muaj koob meej. 2 : 1 - 10.**

2 1 Xyoo ob uas Das Lis Yus ua vaj,
lub xya hli, xiab 21, tus yaj saub As
Nkais hais HUAB TAIS 2 cov lus rau
Ntxos Los Npas Npes, rau Yos Xuas
thiab rau cov pej xeem tias :

3 Nej cov laus uas tseem nyob txog tav
no, puas muaj tus tau pom lub Tuam Tsev
no lub koob meej thaum ub ?
Nyem no ne, nej pom lub Tuam Tsev zoo
li cas ? Nej pom tias lub Tuam Tsev zoo
li yaj ntshis lawm.

4 Tab sis nyem no, HUAB TAIS lo lus
ceeb toom yog zoo li no :
Ntxos Los Npas Npes, koj ua siab loj !
Yos Xuas, koj tso siab mog ! Tas tsoom
pej xeem, nej sawv daws tso siab mog !"!
Nej rau siab ua hauj lwm ! Kuv nrog nej
nyob ! 5 Thaum nej tawm ntawm Hais
Nkws Tos teb kuv nrog nej cog lus. Kuv
lub tswv yim nyob hauv nruab nrab nej.
Nej tsis txhab ntshai.

6 Tsoom tub rog tus HUAB TAIS hais li
no :

"Tshuav tsis ntev lawm, kuv yuav diaj lub
ntuj thiab lub ntiaj teb, cov hiav txwv
thiab cov av khov kho. 7 Kuv yuav diaj
cov kuj cuab tas tib si. Lawv tej nyiaj tej
kub tuaj ntawm no ntau ntau. Kuv yuav
ua kom lub Tuam Tsev no muaj hwj chim
puv hauv."

8 Tsoom tub rog tus HUAB TAIS ceeb
toom li no : "Nyiaj yog kuv li ! Kub yog
kuv tug ! 9 Lub Tuam Tsev no yuav nto
koob meej tshaj lub Tuam Tsev thaum ub.
Kuv yuav tso kev thaj yeeb tuaj nyob
hauv thaj chaw no."

NTXAS KAS LIAS

Ntxas Kas Lias, Zaj 2 thiab 8

Tus tuav hlua tuaj ntsuas Yes Lus Xas Les. 2 : 5 - 9 + 14 - 15.

2 5 Kuv tsa muag ntsia kuv yees pom xyeem ib yam zoo li no : muaj ib tug txiv neej tuav ib txog hlua ntawm tes. 6 Kuv hais rau nws tias : "Koj mus qhov twg ?"
Nws teb kuv tias : "Kuv mus ntsuas Yes Lus Xas Les saib nws dav li cas thiab ntev li cas ?"
7 Ces tus Tshiab uas nrog kuv hais lus txawm txav mus lawm. Muaj dua lwm tus hla mus ua nws ntej. Nws hais rau thawj tug tias :
8 "Koj khiav mus hais rau tus tub hluas ntawd tias : Yes Lus Xas Les yuav nyob qhib rooj lug, vim cov neeg thiab cov tsiaj nyob coob kawg nyob hauv Yes Lus Xas Les."
9 HUAB TAIS ceeb toom li no : Kuv yuav yog zoo li ib lub ntsa loog hluav taws nyob ncig Yes Lus Xas Les tas tib si, thiab kuv yuav yog Yes Lus Xas Les lub koob meej.
14 Leej Ntxhais Xis Yoos, koj hu nkauj thiab koj zoo siab mog ! Koj ntsia kuv tuaj txog lawm ! Kuv yuav tuaj nyob txawm hauv koj.
HUAB TAIS hais li no :
15 Hnub ntawd, ntau haiv neeg yuav khaub zig HUAB TAIS. Lawv yuav yog nws haiv neeg."

Tswv Ntuj yuav sau sawv daws los ua nws haiv neeg. 8 : 1 - 8.

8 1 Tsoom tub rog tus HUAB TAIS hais ib lo lus li no :
2 "Kuv khib rau Xis Yoos vim kuv nyiam nws tshaj Xis Yoos thiab.
3 HUAB TAIS hais li no : "Kuv rov los cuag Xis Yoos, kuv xav los nyob hauv nruab nrab Yes Lus Xas Les. Yes Lus Xas Les yuav hu ua lub tsheej pheej xeeb. Tsoom tub rog tus HUAB TAIS lub roob yuav hu ua lub Roob Ntshiab."
4 Tsoom tub rog tus HUAB TAIS hais li no : "Cov yawg laus thiab cov pog laus tseem yuav tau zaum ntawm Yes Lus Xas Les tej tshav, ib leeg yuav nrig ib rab pas ntawm tes, vim lawv hnub nyoog nchav.
5 Thiab cov tshav nyob hauv lub tsheej yuav muaj me tub me ntxhais tuaj ua si zom zaws puv tas."
6 Tsoom tub rog tus HUAB TAIS hais li no : "Yog haiv neeg no saib qhov ntawd yog ib yam hwj huam yees ntxwv, mas kuv puas yuav saib zoo li ntawd thiab ?"
7 Tsoom tub rog tus HUAB TAIS hais li no : "Nej saib, kuv npo kuv haiv neeg ntawm cov teb chaws nyob sab hnub tuaj thiab ntawm cov teb chaws nyob sab hnub poob. 8 Kuv yuav coj lawv rov los nyob txawm rau hauv Yes Lus Xas Les. Lawv yuav yog kuv haiv neeg. Kuv yuav yog lawv tus Tswv Ntuj nyob hauv txoj kev pheej xeeb thiab txoj kev ncaj."

Yav tom ntej txhua haiv neeg yuav nyiam ua Tswv Ntuj haiv neeg.
8 : 20 - 23.

20 Tsoom tub rog tus HUAB TAIS hais li no :

"Tseem muaj lwm haiv neeg thiab lwm cov neeg nyob hauv tej nroog loj yuav tuaj ntxiv.

21 Cov neeg nyob hauv ib lub nroog yuav mus lawm lwm lub nroog, lawv yuav sib hu tias : Nej nrog peb mus thov Tswv Ntuj mas ! Peb mus ua kom HUAB TAIS lub ntsej muag kaj luag ntxhi ! Peb mus nrhiav tsoom tub rog tus HUAB TAIS mas ! Ntawm kuv mas kuv mus xwb !"

22 Ces ntau haiv neeg ntau lub kuj cuab muaj hwj xyeej yuav tuaj nrhiav tsoom tub rog tus HUAB TAIS, thiab ua kom nws lub ntsej muag kaj luag ntxhi.

23 Tsoom tub rog tus HUAB TAIS hais li no :

"Lub caij ntawd, kaum tus neeg uas hais cov kuj cuab xeem lus yuav nthos ib tug Yus Das tw tsho, ces lawv yuav hais rau nws tias :

"Peb xav nrog nej mus, vim peb hnov hais tias Tswv Ntuj nrog nej nyob."

Leej Pleev. 9 : 9 - 10

9 9 Leej ntxhais Xis Yoos, koj kav tsij dhia hom khaj mog ! Leej

ntxhais Yes Lus Xas Les, koj kav tsij qw suab zoo siab mas ! Ntsia saib : koj tus vaj tuaj cuag koj.

Nws siab ncaj, nws yeej luag. Nws nyiam ua neeg me, nws caij ib tug luj, nws caij ib tug me nyuam luj uas yog tus maum luj xya.

10 Nws yuav xyeeb Es Fais cov tsheb rog pov tseg, nws yuav xyeeb Yes Lus Xas Les cov nees ntaus rog pov tseg.

Nws yuav xyeeb cov hneev ntaus rog pov tseg. Nws ceeb toom tias txhua lub kuj cuab yuav nyob thaj yeeb. Nws lub tuam teb yuav ri txij ib lub hiav txwv mus dhau lwm lub hiav txwv, txij tus niam dej mus txog npoo ntiaj teb kawg.

Lawv yuav ntsia tus uas luag nkaug. 12 : 10 -11.

12 10 Kuv yuav muab ib lub tswv yim hlub neeg, ib lub tswv yim nyiam thov Ntuj los rau Das Vis tsev neeg thiab rau cov neeg nyob Yes Lus Xas Les tib si. Lawv yuav tsa muag ntsia txog kuv, lawv yuav xav pom tus uas lawv nkaug. Lawv yuav nyiav nws xws li nyiav ib tug tub twm zeej. Lawv yuav quaj nws xws li quaj tus tub hlob.

11 Hnub ntawd, ib lub suab nyiav yuav nrov loj zuj zus nyob Yes Lus Xas Les, xws li Has Das Lis Moos lub suab nyiav nyob hauv lub hav tiaj Mes Nkis Dos.

MAS LAS KIS

Mas Las Kis, Zaj 1, 2 thiab 3

Cov Leej Choj tsis zoo.

1 : 1 + 14b + 2 : 1 - 2 + 8 - 9.

1 1 HUAB TAIS lo lus vam txog
Mas Las Kias los ceeb toom rau His
Xas Lais. 14b Tsoom tub rog tus HUAB
TAIS hais tias : Kuv yog ib tug tuam vaj.
Tas txhia haiv neeg saib kuv lub npe muaj
hwj xyeej nyob hauv cov kuj cuab.

2 1 Nyem no, cov Leej Choj, kuv
qhia nej zoo li no :

2 Yog nej tsis mloog kuv, yog nej tsis
muab siab rau ua kom kuv lub npe nto
koob meej, mas kuv yuav xa txoj hmoov
phem tuaj rau nej, kuv yuav tsawm nej
cov lus foom hmoov zoo.

8 Nej ncaim ntawm txoj kev lawm. Nej
tej lus qhia ua kom coob leej ntog. Lo lus
uas kuv nrog cov Les Vis cog mas nej
rhuav pov tseg tas lawm !

9 Ces kuv thiaj ua kom tas tsoom pej
xeem thuam nej thiab saib nej tsis muaj
tsim, vim nej tsis taug kuv txoj kev thiab
thaum nej qhia tsoom sid mas nej nyiam
ib txhia thiab nej ntxub ib txhia.

**Thaum txog HUAB TAIS lub hnub
nyoog, nws yuav ua kom neeg huv
tuaj. 3 : 1 - 4.**

3 1 Kuv yuav xa kuv tus tub tshaj xov
mus tho kev ua kuv ntej. Ib sij
huam, tus Huab Tais uas nej nrhiav nws
yuav chaws los hauv nws kem tsev
ntshiab. Tus Tshiab tuav lo lus cog uas
nej nyiam nws tuaj txog ntawd lawm !
Yog tsoom tub rog tus HUAB TAIS hais

li ntawd :

2 Hnub nws tuaj txog, leej twg yuav
nyob taus ? Thaum nws yuav tawm tuaj
leej twg yuav sawv taus ntsug tos nws ?
Nws yuav zoo li tus nchuav hlau cov
hluav taws. Nws zoo li tshuaj ntxhua
khaub ncaws.

3 Nws yuav tuaj nchuav nyiaj kom huv
tuaj. Nws yuav ua kom Les Vis cov tub
huv tuaj, ib yam nchuav kub thiab nchuav
nyiaj kom tau cov tseem kub tseem nyiaj.
HUAB TAIS yuav saib lawv yog cov cev
thaj txi Ntuj raws kev ncaj.

4 Ces HUAB TAIS yuav pom zoo txais
Yus Das thiab Yes Lus Xas Les thaj txi
Ntuj ib yam li lub hauv paus thaud.

**Txog HUAB TAIS lub hnub
nyoog, HUAB TAIS yuav xa kev cawm
neeg tuaj. 3 : 13 - 20.**

13 HUAB TAIS hais li no :

"Nej hais lus nchav nchav txog kuv !"

Tsis kav nej tseem hais tias :

"Peb tau sib tham dab tsi tsis zoo txog
HUAB TAIS ?"

14 Nej hais li no :

"Kev tsob hwb Tswv Ntuj tsis zoo dab tsi.
Peb tau coj nws cov lus qhia, peb tau quaj
tu siab nyob ntawm tsoom tub rog tus
HUAB TAIS xub ntiag, peb ua zoo li
ntawd, peb tau tus dab tsi ?"

15 Nyem no peb hais tias : cov neeg tau
zoo yog cov neeg muab hlob. Cov ua
phem lawv yog cov vam meej. Lawv sim
Tswv Ntuj tab sis lawv kuj tseem tau
nyob zoo thiab !"

16 Ces cov hwm HUAB TAIS tham zoo

Mas Las Kis, Zaj 3

li no. HUAB TAIS mloog lawv, nws hnov lawm. Tej lus ntawd twb sau cia tas rau hauv ib phau ntawv nyob ntawm HUAB TAIS xub ntiag, kom HUAB TAIS tau pab cov vam khom txog nws thiab nco txog nws lub npe.

17 Tsoom tub rog tus HUAB TAIS tshaj li no :

"Thaum txog hnub kuv npaj cia mas cov ntawd yuav yog kuv tug. Kuv yuav khuv leej lawv xws li ib leeg txiv khuv leej nws tus tub uas tsob hwb nws.

18 Ces thaum ntawd nej yuav rov qab pom tias tus neeg ncaj txawv tus neeg

nkhaus. Tus tsob hwb Tswv Ntuj txawv tus tsis tsob hwb.

19 Vim nyem no Huab Tais lub Hnub Nyoog tawm tuaj ntaiv cuag li ib lub qhov txog, mas cov neeg siab phem yuav zoo li ib co quav nyab. Lub Hnub Nyoog uas tuaj yuav txog ntawd, yuav hlawv lawv tas huv tib si, kom tsis txhob tshuav ib tug kav los ib tug cag.

20 Tab sis nej cov uas hwm kuv lub npe, thaum lub Hnub Pub Kev Ncaj yuav ci tuaj, mas nws yuav xa txoj kev ncaj tuaj rau nej. Nws cov sab hnub yuav coj kev cawm neeg tuaj rau nej."